

四庫全書

史部

欽定四庫全書

史部

皇朝文獻通考卷五十二

內閣中書臣實汝翼覆勘

總校官中書臣孫溶

欽定四庫全書

皇朝文獻通考卷五十二

選舉考六

舉士

乾隆四十一年

諭朕因平定兩金川集勲奏凱巡幸山左告成泮林山東及各省士子聯袂迎鑾抒誠忭頌進獻詩賦者甚多因照從前巡幸之例命題考試就其文義量加甄

錄所有列在一等之貢生黃道熹李憲喬監生蔡廷
衡俱著賞給舉人其舉人竇汝翼秦瀛著以內閣中
書用其列在二等之舉人貢監生員李佩鸞等十六
人俱著賞給緞二疋以示優武修文慶惠士林之至
意

又

諭朕因平定兩金川告成

闕里回鑾舉行郊勞盛典蹕途經過津門直隸各省士

子祇迎道左忭頌抒誠進獻詩賦者甚多因照此次在東省召試之例就其文義量加甄錄所有列在一等之進士邱桂山等五人俱著以內閣中書補用蔡萬年等三人俱著賞給舉人其列在二等之舉人貢監生員周光裕等二十人俱著賞緞二疋以示嘉惠士林之至意

又

諭繙譯鄉會試停止以來已二十餘年近日滿洲學習

清文善繙譯者益少著加恩以乾隆戊戌年八月考試繙譯舉人已亥年三月考試繙譯進士尋議繙譯會試所有中式繙譯進士應與文進士一體截取選用知縣其有歸班銓選者應以翰林院典簿等缺補用

四十二年

諭昨檢閱內廷舊存摺奏內有康熙五十六年詹事王弈清密奏請於考官入闈後即諭謄錄官凡七藝破

承開講等虛字概不謄寫以防關節王奕清所奏自屬防弊之一法但將破承起講等虛字概不謄寫於文理既不明順且篇幅不完體制尤多未協朕思與其暗防弊竇不若明示章程況近今鄉試頭場改為書藝三篇尤易防範嗣後令順天及各省主考官於刊發題目時即酌定三篇內承題起講應用虛字明白開列另行刊印一紙分給舉子如此科篇首承題用夫字次篇用蓋字三篇用甚矣起講首篇用今夫

次篇用且夫三篇用嘗思之類下科即將此等虛字
錯綜更換總聽主考臨期酌定俾衆共聞知通場一
體遵用違者貼出如此於防範更為周密至會試亦
著照此通行將此旨通諭中外知之并刊入科場條
例

又議定房考官無庸分經閱卷及定試卷分東章
程奉

諭向例鄉會試同考官分經閱卷易書詩三經卷分三

四五房春秋禮記卷止分一二房以一二專閱一經則暗藏關節易於識認立法不能無弊況各經卷多者一房閱至數百卷甚且多至千卷其卷少者一房止閱一二百卷校閱多寡亦覺懸殊各省主考既以一人兼閱五經卷則房考官同係科甲出身諒無不能閱看他經之理著自乾隆丁酉科為始鄉會試考試官俱不必拘泥五經分房如房官十人試卷五千本則每房各閱五百卷均勻分派其每經分中卷

數仍照原額如此各房通看即欲呈送關節勢不能
遍送多人於防範更為周密而各房考均勻派閱亦
不慮多寡相懸致滋草率之弊將此通行曉諭并刊
入科場條例一體遵行嗣經議奏分給試卷係漢御
史一員主持其事應請再定以掣籤分卷之例先
令至公堂監臨知貢舉等官於每次進試卷時照
房考十八員之數將試卷分為十八束分別登簿
即用簽開寫第一束第二束等字樣鈐蓋監臨知

貢舉關防送進內簾考試大臣會同滿漢御史及
收掌官先將第幾房掣籤次將試卷第幾束掣籤
當堂分給仍填號登簿以便稽核其二三場試卷
即照頭場號簿辦理如此則各房試卷並無須逐
卷分派而分卷關通之弊不禁而自除至各省鄉
試內簾閱卷並請照此掣籤分給以昭畫一從之
又

諭大學士于敏中等將順天鄉試會試卷如何分束之

處會同順天府禮部詳細酌議尋稱順天鄉試卷有滿合南北中四之分房考有旗員南北中籍貫之別
乾隆三十三年欽奉

上諭嗣後順天鄉試仍照乾隆六年所降諭旨南省人迴避南四卷北省人迴避北四卷邊省人迴避中四卷著為令誠以防弊竇而慎遴選法至善也今議將試卷概分為十八束若以應迴避之卷錯雜其中房考仍難於閱看查近科試卷數目其滿字合字

夾字旦字及中四北四等卷約在一千七八百卷
及二千餘卷即分為南籍房考應掣之卷南四卷
約在九百餘卷及一千餘卷即分為北籍房考應
掣之卷如有旗員及邊省人員併入北籍房考數
內核計將此儘數酌分十八束其貝字號試卷約
在五千餘卷以外除直隸籍貫官員例應迴避順
天鄉試其餘各籍房考俱可通行閱看則以貝字
卷量為勻配以均十八束之數不致多寡參差其

二三場試卷只須按滿合南北中四貝夾旦等字樣分束概送內簾令查明第一場掣卷號簿照例分給閱看如此庶於掣籤分卷之中仍與迴避之例不相違碍再查會試按省分額房考閱卷向止迴避本省今鄉試分卷之法既定為兩項分掣則會試分卷自可比照核辦臣等謹就各省卷數及中額多寡均勻搭配並照上兩科

欽派房考籍貫應行迴避之省酌分兩項其迴避員數

稍多之項應閱卷數分為十束

八旗浙江江西湖北河南福建湖北

湖南廣東廣西雲南等卷分為十束約共二千餘卷

迴避員數較少者所閱

卷分為八束

奉天直隸江南山東陝西四川貴州等卷分為八束約共一千七百餘卷

每束卷約在二百以外合計總數不甚相懸知貢舉提調於分送封固後將某省若干卷標於封面至送入內簾即交主考官同內監試按照房考迴避省分員數查對卷束掣籤分閱其二三場試卷亦即照鄉試辦理庶立法更周而查辦亦易但每

科

欽點房考省分員數多寡不能一律應令知貢舉提調
臨時按照

派出房考員數省分卷數倣此式量為分配具摺奏
聞遵照辦理從之

又奉

諭科場外簾各官子弟迴避之例節經御史條奏禮部
議覆准行其中尚有未甚允協者如監臨知貢舉監

試提調總辦場內一切事務其受卷彌封謄錄對讀
收掌等官亦各有承辦試卷之責自應令其子弟迴
避以杜弊端若兩翼副都統叅領章京不過入場彈
壓事畢即行出闈與考試文字毫無干涉至供給等
所並不與士子相見即順天府所委之巡綽等官止
於號外巡查不能進號關照又如磚門御史點名後
例不入場亦可毋庸防範所有副都統叅領章京磚
門御史及供給巡綽等官嗣後俱不必迴避即自今

年為始著為令

又議定現充謄錄不准重考別館禮部議奏各館
現充謄錄人員嗣後遇考試漢教習之時俱不准
其考試並查明現在如有謄錄教習兩處兼走之
員係先補謄錄者即將教習撤回係先補教習者
即將謄錄撤回如係肄業外班於依限寫書之外
仍可自理本業毋庸扣除以昭平允從之

又議定申明祖籍寄籍並聲明冒籍條例吏部議

准侍郎蔣賜棨條奏本年八月遵

旨定議聲明祖籍寄籍將不由科目出身之各項人員
責成地方官督撫及驗看大臣科道稽查籍貫如
有混冒即行糾叅治罪嗣後順天中式舉人寄籍
者發榜後填寫親供並令據實呈明改歸原籍如
無家可歸亦令呈明原籍及因何不能改歸緣由
確實註冊其實係順天土著取同中舉人互結順
天府查明造冊送吏部禮部存案備查倘仍有含

混隱匿情事後經查出本人治罪互結舉人及順天府承辦之員議處即以本年丁酉科為始遵照辦理

又議准御史戈源條奏申明冒籍條例四款一查乾隆九年議准考試大宛童生究出冒籍情弊廩保照變亂版籍例杖八十革去衣頂如受財冒保計贓從重論教官受賄革職交刑部計贓定罪一查乾隆九年二十一年清查籍貫議令廩生一體

查明改歸距今日久自宜申禁令應照吏部議准
鄉試中式之例飭令改歸無家可歸者呈明註冊
如實係土著亦飭取各生互結憑查交順天府飭
該縣教官分別辦理一查定例考試大宛童生派
審音御史滿漢各一員現在南籍御史一體開列
誠非遠嫌防弊之意應行迴避扣除一查順天貢
監於乾隆二十二年奉

旨令學政於錄科時嚴加察驗以杜假冒是學政錄科

原有稽查之責惟錄科之前該貢監等先赴大宛
兩縣起文該縣於給發印文時自應逐一查核嗣
後令該縣確實查明申送如並不詳查輒行送考
照審音不實例議處至申送後仍令學政覆加查
察不得因有地方印文率行收考

又

諭向來雲南貴州舉人進京會試一路賞給驛馬騎坐
所以體恤遠方寒峻者至優極渥本年陝西鄉試中

式第二名舉人黃斌即係新設迪化州阜康縣人可
見關外人文漸盛殊屬可嘉第念該處進京道里較
雲貴等省更遠即每科新疆士子赴西安鄉試路亦
不近而新疆車馬等項僱覓維艱殊堪軫念嗣後嘉
峪關以外士子赴西安鄉試及進京會試並著加恩
照雲貴之例一體賞給驛馬以示優恤邊陲寒士之
至意

四十三年

諭今年繙譯鄉試前經降旨於八月舉行但今秋起鑾
前往盛京先期舉行為便著將繙譯鄉試改為七月
又議定彈壓填榜日書吏人役禮部左侍郎謝墉
奏稱填榜放榜日期外簾自知貢舉以下俱集聚
奎堂共襄開榜供給等官率厨匠皂役亦并入內
龍門人數既衆禮部鈐榜官到時護印護榜送錄
領卷官并欽天監候時官等下至書吏家人一擁
而入向未設有彈壓之員往往紛紜雜沓有爭先

捷報關通傳信以圖厚利至毀物傷人末由迹問
且設有匪猾乘此作奸則必至疎縱尤不可不防
微而杜漸應請

旨飭令原

派之副都統二員於填榜之日早赴貢院至公堂前會
同外簾巡察御史查驗覈實放入臨期同入內龍
門在聚奎堂外仍分兩翼各帶兵數名彈壓巡查
從之

又

諭文以明道自當以清真雅正為宗曾諄諄訓諭而文風總未能醇蓋非一朝一夕之故本年會試闈中進呈前十名卷朕詳加披閱文體較為純正尚不失制義之本發榜後詢之大學士于敏中據奏近年風氣喜為長篇又多沿用墨卷膚詞爛調遂爾冗蔓浮華即能文者亦不免為趨向所累等語士子平日覃心經術探討古文及時文諸大家以立其體作文尤須

體會先儒傳說以闡發聖賢精蘊獨出心裁屏除習見語其文自然合度何必動輒千言因陳不察耶昔陸機云要辭達而理舉固無取乎冗長韓愈云惟陳言之務去二語實文章正鵠士子宜深味乎其言嗣後鄉會兩試及學臣取士每篇俱以七百字為率違者不錄其庸熟墨卷悉行剔除又或過為新奇墮入牛鬼蛇神惡道尤在所澄汰操觚者慎毋掉以輕心司衡者各宜示以正軌務期風會蒸蒸日上以副朕

崇雅黜浮之至意

又議更定同考官仍用藍筆大學士于敏中奏稱
同考官評閱硃卷近科改用紫筆似未妥協查向
例評閱硃卷同考官用藍筆主考用墨筆三色較
然且藍筆用於硃字之旁亦不嫌太素自乾隆三
十六年經禮部議定將內外簾所用藍筆悉行改
易因將同考官閱卷改用紫筆色稍淡即易與硃
相混圈點加於字旁不甚分明設或點乙數字亦

難以辨別甚至內簾書吏繕寫文移登記檔案並用紫筆尤覺非宜臣愚以為同考閱卷應仍照舊用藍筆其內收掌及書吏並當一體更正惟內簾監試御史仍用紫筆庶足以昭慎重從之

又

諭國子監助教吳省蘭助教銜張羲年學問尚優且在四庫館校刊羣書頗為得力俱著加恩准其與本科中式舉人一體殿試

又選拔貢生引

見奉

旨以部員用者十五人經吏部奏定以七品小京官用
又

諭本年選拔貢生除引見分別錄用外其餘已經考試
各生如有情願自備資斧在四庫書館効力者准其
呈明充當謄錄嗣經議准寫書之日為始扣足五年
期滿照例辦理

又議減定商學額數及設立鹵字號中額大學士
九卿會議御史戈源條奏近來商學商人子弟日
少外省假冒日多請將商籍生員一體勒回原籍
將各處商學運學各額概行刪除查商籍定額始
自順治十一年相沿日久若因清釐冒考概將真
商學額

恩例裁除亦未允協商學運學原額直隸山東陝西均
取進八名山西取進十二名江南取進十四名廣

東取進二十名浙江取進五十名額數既多寡不
等文風亦高下不齊是以南省之人每樂向北省
夤緣若核實定額即本商亦不肯輕以予人應請
敕交各省督撫學政通查各省真商親子弟姪應試者
核計人數多寡另行酌減學額具奏

欽定至鄉試若實因道路寫遠必在商籍就近應試當
照直隸從前另編鹵字號之例定額取中除廣東
舊設有鹵字號中額外其餘直隸江南浙江山東

山西陝西均查明從前另設鹵字號之例歸於該
省定額內五十名取中一名雖應試多至數百名
總不得過二名之額如有因人數過少不敷取中
情願改歸本籍者准其呈明改歸嗣議准山東學
政姚梁奏商籍之設原因民人遠出充商其子弟
不能回籍應考准在行鹽地方入籍嗣後實係遠
商其子弟照例收考

臣等謹按四十四年議准江蘇商籍鄉試之人每

科多則十二三名少則六七名不敷另編鹵字號
請併入民卷取中有情願改歸本籍者准其呈明
改歸本籍鄉試謹附識

舉行繙譯鄉試

諭繙譯鄉試卷止須彌封交送內簾校閱毋庸另行謄
錄

是年奉

旨開

萬壽恩科

諭朕本意以庚子年為朕七旬慶辰越歲辛丑即恭逢聖母九旬萬壽斯時數天同慶自當臚歡祝

嘏以抒萬姓惓忱今既不能遂朕初願尚復何心為已稱慶但天下士民遇朕七旬皆不免望恩幸澤此則情理之常亦何肯因不舉行慶典並靳恩施乎著於己亥年八月舉行恩科鄉試庚子年三月舉行恩科會試以彰壽考作人之盛

四十四年舉行繙譯會試

又

諭熱河庠生照宣化府之例另編承字號每科鄉試取
中舉人一名

又准各省謄錄歸入皿字號應順天鄉試

又

諭近來凡有諭旨應兼蒙古文者必經朕親加改正方
可頒發而以理藩院所擬原稿示蒙古王公等多不

能解緣繙譯人員未能諳習蒙古語就虛文實事敷衍成篇遂致不相脗合又如從前德通所繙清文阿岱閱之往往不能盡曉夫阿岱素精國語無不備知其所以不曉德通之清文者非阿岱不通清語乃由德通拘泥漢字文義牽綴為文於國語神理全未體會是歧清語與清文而二之無怪其相背也則蒙古王公等之不解理藩院之蒙古文其義亦然總由國朝定鼎至今百有餘年八旗滿洲蒙古子弟自其祖

父生長京城不但蒙古語不能兼通即滿洲語亦日漸遺忘又復憚於學習朕屢經訓示而率教者無幾固由習俗所移亦其人之不肯念本向上耳朕因絜矩而思之非特此也即如制義所以代聖賢立言雖古今時會不同而中國語言相沿未改無難會意追求乃今之所為時文朕覽之多不能解朕雖不喜作時文然向在書齋中於明季及國初名家大家之文亦曾誦習其中如歸有光黃淳耀純乎古文讀之心

喜餘亦理精義正足供玩味柰何今之作者相戾若
此至於文理之變固不始於今時曩者魏晉六朝習
尚浮靡斯文極敝韓愈出而起衰八代約六經之旨
以成文人見之轉以為怪故其言曰作俗下文字下
筆令人慚及示人必以為好小慚者謂之小好大慚
者即以為大好是文士趨向之壞在韓愈時且然何
況今之距唐又將千載乎夫文風遞降說者每以比
之江河日下然聽其流而不返日甚一日伊於胡底

昔韓愈尚思迴狂瀾於既倒矧有移風易俗之責者乎文以明道宜以清真雅正為宗朕曾屢降諭旨諄諄訓誡無如聽之藐藐恬不為怪讀書人於此理尚不能喻安望他日之備國家任使乎大抵近來習制義者止圖速化而不循正軌每以經籍束之高閣即先正名作亦不暇究心惟取庸陋墨卷勦襲擗摻效其浮詞而全無精義師以是教弟以是學舉子以是為揣摩試官即以是為去取且今之舉子即異日之

試官不知翻然悔悟豈獨文敝即士習亦不可問矣
嗣後作文者務宜沉潛經義體認先儒傳說闡發聖
賢精蘊務去陳言辭達理舉以蘄合於古人立言之
道慎毋掉以輕心試官閱卷亦當嚴為甄別一切膚
詞爛調槩擯不錄庶幾共知謹凜文化蒸蒸日上以
副朕崇雅黜華之至意其繙譯清文蒙古文亦當實
力講求勿仍陋習此旨著頒示貢院暨各省學政及
繙書房理藩院各書一通揭之堂楣俾皆觸目警心

欽承母忽并諭中外知之

又

諭明歲又屆庚子鄉試正科各省正副考官應行陸續
簡派而雲貴省向例於四月中旬進本其時朕南巡
尚未回鑾不能預行考試而今歲考差後尚有陸續
進京銷假及陞補各員應與考者亦頗不少未便獨
令向隅莫若於今冬再行考試一次除本年已出各
省試差及上年會試曾經分校人員毋庸考試外著

交吏部查明各衙門應行考試人員開具清單於十
月中旬奏請定期考試以備簡用嗣經吏部奏請本
年順天鄉試分校各員亦著一體無庸考試以昭
平允從之

又

諭原任大學士劉統勳之孫劉鏞之現應順天鄉試未
能中式著加恩賞給舉人一體會試

又

諭原任尚書王際華之子王朝梧昨歲已降旨賞給內閣中書著加恩准其一體會試

又

諭昨大學士于敏中之孫于德裕中式舉人前赴行在謝恩因令其將闈中詩文默出呈覽雖大致尚屬清順但其首篇內朝廷自有養賢之典何臣子偏為過激之辭小臣意為棄取而大君馭富無權又今日之粟出之於國非出之於家國家無以報功而羣下適

為多事等句語意俱與傳註不合朱註云孔子為魯
司寇時以思為宰是思乃孔子家臣九百之粟即夫
子所與非受祿於魯國更非頒祿於周室也朝廷之
語魯國尚不足以當之而況夫子之家乎又云夫子
行芳志潔行芳非六經所有而以擬夫子更覺不倫
此實認題不真及遣詞不當之故但恐通場類此者
或所不免而今年鄉試揭曉適當木蘭秋獮迴蹕熱
河之時闡中十魁卷例不先行進呈朕無由得見因

命軍機大臣取閱中所刻元魁卷前十名勘閱粘簽
進呈則首名破題即有尊國制所以重君恩之語而
其他如以功詔祿以祿馭富朝廷詔稽之典國家之
體制垂焉上尊政體下廣國恩計功詔祿國典攸關
御廩之頒天家之餼等句十名中不可枚舉即其中
偶有敍及為宰者亦未切實發揮均未能體會正解
總由近時文風日壞習制義者祇圖速化而不循正
軌無論經籍束之高閣即先儒傳說亦不暇究心專

取浮詞俗調擣搯求售師以是教弟以是學舉子以是為揣摩試官即以是為去取豈可聽其流而不返乎前曾降旨釐正文體務以清真雅正為宗著再明白曉諭嗣後作文者各宜體認先儒傳說闡發題義試官閱卷當嚴為甄別若仍復掉以輕心必令將此庸陋之句悉心磨勘以示懲儆毋謂朕不戒視成也將此通行傳諭知之

四十五年

諭浙江進獻詩冊考取一等之馬履泰沈颺李彤沈叔
埏著特賜舉人授為內閣中書學習行走與考取候
補人員挨次補用其二等之吳純等十三名俱著賞
緞二疋

又

諭江蘇安徽進獻詩冊諸生其考取一等之舉人汪履
基著授為內閣中書遇缺即補呂光復等十人俱著
特賜舉人授為內閣中書學習行走與考取候補人

員挨次補用江西省考試一等之蔣知讓裴元復著
照直隸山東召試之例賞給舉人准其一體會試其
江蘇安徽江西三省考列二等之葉恩紱等三十三
名著各賞緞二疋

定內簾官入闈後遇有服制事故毋庸即行移會
知貢舉謝墉疏奏考官入闈後遇有丁憂事故其
應行出闈與否於例未有明文請凡在十五日以
後者文到禮部暫行押住并不必移文知貢舉如

屆十三四日間經禮部移知至公堂以已未送卷
為率酌定查定例同考官入闈後如遇有事故奏
明交與考官通融辦理毋庸另派是考官入闈後
遇有事故向例俱令出場於防閑未為周密今據
知貢舉謝墉所奏較舊例固為詳慎但閱卷既虞
洩漏而試題尤應關防嗣後鄉會試主考同考內
簾等官入闈後遇有服制事故無論曾否送卷該
承辦衙門毋庸移會場內均俟撤棘之日令其守

制從之

又

諭制藝以清真雅正為主其在前列者尤為士林模楷
必擇理醇法密辭語精當之作方足以式多士而正
文體今日據磨勘大臣奏到覆勘本科會試中式第
三名之鄧朝縉首藝內有讀鴟鳩在桑之什而表裏
瑩然咏鶴鳴九皋之篇而精粗不紊峻德著協和之
績可驗表裏之無違于羽本文德之敷可見精粗之

悉舉等句語意粗雜理題不應有此所奏甚是此等
題文在士子擇語不精率意填寫或所不免此卷現
據指出而其餘似此未經磨勘者當復不少但即使
舍短取長亦只可在二三十名外今竟高列第三名
位置殊為失當近年因文體踳駁屢經降旨訓飭凡
有衡文之責者尤應悉心甄拔以期有醇無疵使文
風日臻淳雅何致漫無區別若此著總裁德保等明
白回奏

又

諭前以各省舉人選用知縣需次至三十餘年因於壬申辛巳丙戌壬辰等科降旨挑選分發各省試用於銓政既無壅積而士子得及鋒而試不致淹滯多年今因三十七年壬辰科挑選以後距今又屆九年所有分發一等舉人各省將次用完即二等之教職亦俱陸續補用著該部於明年辛丑科會試榜後請特派王大臣再行挑選並照例將近四科舉人扣除俾

科分較深者得早乘時自効

又議更定開列稽察御史條例都察院左都御史
張若漑疏稱鄉會試外場內場內簾三處派有御
史監試所以稽察弊端責任綦重向例惟將資淺
御史依次開列二十員指定所司之事請用十員
是一年半年之前已可揣度而知保無請託照應
請嗣後一體通行開列

聖明簡用之人非資格揆定之人於闕防更為周密從

之

又

諭鄉試為掄才大典欲拔真才先清弊竇本年順天鄉
試經搜檢王大臣奏拏獲懷挾傳遞及頂名代倩不
一而足各犯已交部從重辦理用昭炯戒順天科場
特派王大臣等於磚門龍門逐次嚴查尚有此等弊
竇何況外省稽察搜查斷不能如京師之嚴密該巡
撫等職任監臨摘弊防奸是其專責乃歷年披閱各

該撫奏摺惟今年富綱奏稱先於場前訪查積習出示禁諭并增築夾牆另開更道於擡運人夫逐加搜檢印用號戳並不假手吏胥等語辦理較屬認真此外則均以三場無弊一奏塞責並未見有查出懷挾傳遞頂冒之事豈作奸犯科者惟順天有之而各省竟俱弊絕風清如此乎實因各撫臣模稜市譽不肯認真任怨耳夫取怨於作奸犯科之人亦何妨乎嗣後各省巡撫凡遇大比之年必須實力稽察慎密防

聞如有前項弊端即當立時查獲嚴加究治從重核
辦務令闡中積弊肅清士子懷刑自愛庶足以甄別
人材振興士習將此通諭知之並令於每科引旨覆
奏著為例

又

諭據磨勘試卷大臣奏江南省第一名顧問卷頭場四
書文三篇純用排偶於文體有關且首藝未經點題
請將該考官及本生交部查議制藝代聖賢立言原

以清真雅正為宗朕屢經訓諭不啻至再至三何得
又將駢體錄取且拔冠榜首所謂釐正文風者安在
况三藝俱用排偶場中易於辨識并不必再用字眼
關通更易滋別項情弊殊屬不合除將該舉子交部
照例查議外所有江南省正考官錢載副考官戴均
元著交部議處並將此通諭知之

四十六年

諭向來殿試新進士有至次早始交卷者雖伊等草茅

新進對揚之始未免矜持但考試給燭最滋弊竇至
於連宵達旦則更長人倦防閑更未能周且朝考例
作四題尚不過日入完場而殿試對策一道窮日之
力寫作已可從容何必焚膏繼晷始得成章乎況殿
廷重地尤宜謹慎嗣後殿試交卷至遲亦以日入為
度不得仍准給燭其不能完卷者仍准列入三甲末
士子等各宜自勉以副朕剔弊遴才之至意

又

諭各省大挑舉人分發試用向例原以省分大小酌定
挑數自乾隆三十七年壬辰科部臣始以遠省挑十
之六近省挑十之五定例請旨固為邊遠士子跋涉
較難格外優恤起見而未思及近省中式者本來人
多遠省本來人少茲朕閱本年各省大挑舉人名單
內所挑近省舉人科分有遠至三十五六年者而遠
省科分最久不過二十餘年蓋因直隸江浙等近省
係中式舉人會試三科始得揀選而雲貴川廣等遠

省會試一科即行揀選是以遠省科分畧深者業已
挨班選用其得官已較近省為優今大挑舉人再按
五六分挑取則大省科分較深舉人轉多壅滯除本
年已經辦畢無庸議外至乾隆五十二年丁未科再
加恩舉行大挑時無論省分遠近但就人數多寡均
勻挑取俾遠近士子均得乘時自効以示朕加惠寒
畯之至意

四十七年

諭大學士九卿科道等將從前任克溥條陳諸弊會議具奏摺內稱現在綱紀肅清前代秕政俱已革除淨盡惟在大小臣工實力奉行自不致有因循廢弛之弊此語朕疑信半焉亦惟日慎一日所其無逸耳至副都御史巴彥學有請更定科場詩論以杜關節以端士習之奏所言實為深切時弊不虛朕降旨之意已依議行矣蓋詩題係朕所命且律句謹嚴難以揣摩又若頭場詩文既不中選則二三場雖經文策問

間有可取亦不准復為呈薦倘同考官仍蹈故轍監
試官即可指名叅處如此亦防弊之一端巴彥學此
奏殊可嘉尚又御史鄭澂稱論內易藏關節一款已
於巴彥學摺內准行

又議覆准舉貢監生員仍得改習經書先是三十
五年准廣西學政童鳳三奏請舉貢生員改經之
例永行停止今御史施學濂奏稱定例以後春禮
孤經習者漸少邊省尤甚閱卷不過數本嗣後舉

人會試貢監生員鄉試之年仍照向例不准改經外其平時將所習之經具呈請改者原非臨場趨避應令舉人由該州縣申詳督撫貢監生員由州縣教官分詳學政准改立案並於年終彙造清冊咨報禮部以憑查核從之

四十八年

諭鄉會試派出主考官官秉公閱看試卷由內監試按照卷數分為十八束籤派各房閱看此定例也各房

官誠能細心檢閱矢公矢慎閱薦之後聽主考取中
自可甄拔真才即有一二不肖房官欲通關節設其
人不在所分卷束之內亦無從作弊近聞闈中房考
於閱卷時竟有互相披閱之事如此則彼此通同其
流弊何所底止嗣後房官於分卷後止准各就所分
之卷悉心校閱不得互相抽看著主考官並內簾監
試御史時加查核如有仍蹈前轍者指名叅奏毋稍
瞻徇

又定停止彌封紅號並二三場佳卷通行校閱例
大學士公阿桂等會議掌江南道監察御史孟生
蕙奏請停止彌封紅號以防割換藏匿之弊科場
試卷定例糊名易書將硃卷戳印紅號分送內簾
其紅號一項責令彌封所官親手用印防範本極
嚴密上年御史梁景陽條奏請將頭場硃卷卷面
於印號登簿後照墨卷之例一體彌封經禮部議
准通行誠恐不肖胥吏藉紅號關通內簾易於辨

識亦為豫防竇弊起見但據御史孟生蕙具奏本年順天鄉試監試外場所見試卷紅號照新例彌封分送內簾辦理諸形掣肘且恐易滋割換卷面之弊自係現在實情並據查照向來舊例本極詳盡是欲嚴杜弊端惟在監試提調官遵照成例留心查察胥吏人等毋許絲毫洩漏何致內外關通况紅號一經彌封則落卷無可查對勢難保無割換匿藏情事是欲除弊轉以滋弊自未便輕改前

例徒致分更應如所奏將彌封紅號停止仍照舊
例辦理再現在條例律詩改置頭場主考等官將
頭場閱薦既畢再分閱二三場即不得復薦頭場
從前欽奉

諭旨三場並重久經遵照辦理今概令於取中已定後
再將二三場核對其頭場未取中者主考房考官
轉可藉名防弊全不寓目是後場竟屬具文殊非
核實之道嗣後令各房考於頭場閱薦既畢即將

二三場通行細閱如實有出色佳卷仍准補薦頭
場聽主考官酌量取中則博採之中仍寓防閑之
意從之

五十年又議申定二場論題並用孝經性理禮部
尚書姚成烈疏稱查鄉會試舊制二場論題孝經
與性理按科輪出數科以來祇以性理命題恐士
子以孝經為

功令所不及度之高閣祈

皇上敕令查明舊制凡典試論題將孝經仍與性理輪
出使天下士子益知仰體

皇上孝治天下之意從之

臣等謹按順治十六年議准鄉會試後場論題令
考官間出孝經以勵士習又康熙二十九年以孝
經論題甚少將性理太極圖說通書西銘正蒙一
併命題嗣後或專用性理或專用孝經或二書參
用更改不一乾隆二十一年奉

諭旨將論判表概行刪省二十三年御史吳龍見奏准鄉會試仍出性理論一題未曾分晰具奏以致近科惟以性理命題茲經禮部議奏二場論題仍將孝經與性理二書兼出著為令式所以敦崇實學者至矣

又定江南陝西二省迴避安徽甘肅現任官子弟例御史丁雲錦疏稱江寧司道首府首縣准用安徽籍貫人員其子弟等即在江寧省城應試情形

與各省不同迹涉嫌疑應酌定條例防於未然所
有江南省城司道首府首縣之安徽籍貫人員其
子弟宗族姻親概令迴避但須查明鄉試之時現
在履任者方照此辦理若屆期改任別省及業經
回籍者不在此例又內外簾官不應調取安徽籍
貫人員例無明文應請一併載入科場條例再陝
西省城司道首府首縣亦准用甘肅籍貫人員其
子弟等即在西安鄉試亦應照此畫一辦理從之

又議申定雜項考試人數二百名以外歸貢院考試

又

諭九卿議覆御史梁景陽條奏滿漢雜項考試應酌歸貢院一摺內稱嗣後各項考試人數在五百名以內仍令在午門考試如五百名以上應歸貢院所議未為允協午門為朝會之所考試人數較多不但稽察難周且於觀瞻有礙嗣後人數在二百名以內仍在

午門考試如至二百名即歸貢院考試著為令先是三十四年准御史五章阿奏請一切雜項考試人數在五十名以內仍照舊例在

午門考試至五十名外歸貢院考試嗣於四十八年刑部尚書胡季堂言貢院地方閒曠難於防範請仍在

午門內外朝房辦理今因御史梁景陽疏請仍歸貢院考試經九卿議奏從之

登科總目

順治三年三月

廷試李興崇等三百七十三人

賜傳以漸等進士及第出身有差

四年三月

廷試李人龍等二百九十八人

賜呂宮等進士及第出身有差

六年四月

廷試左敬祖等二百九十五人

賜劉子壯等進士及第出身有差

九年三月

廷試滿洲進士麻勒吉等五十人

賜麻勒吉等進士及第出身有差

廷試張星瑞等三百九十七人

賜鄒忠倚等進士及第出身有差

十二年三月

廷試滿洲進士查親等五十人

賜圖爾宸等進士及第出身有差

廷試秦鉞等四百四十九人

賜史大成等進士及第出身有差

十五年三月

廷試張貞生等三百四十三人

賜孫承恩等進士及第出身有差

十六年九月

廷試朱錦等三百七十六人

賜徐元文等進士及第出身有差

十八年四月

廷試陳常夏等三百八十三人

賜馬世俊等進士及第出身有差

康熙三年三月

廷試沈珩等二百人

賜嚴我斯等進士及第出身有差

六年三月

廷試黃仍緒等一百五十五人

賜繆彤等進士及第出身有差

九年三月

廷試宮夢仁等二百九十九人

賜蔡啓傳等進士及第出身有差

十二年三月

廷試韓莢等一百六十六人

賜韓茨等進士及第出身有差

十五年三月

廷試彭定求等二百九人

賜彭定求等進士及第出身有差

十八年三月

廷試馬教思等一百五十一人

賜歸允肅等進士及第出身有差

召試博學鴻詞一等彭孫通等二十名二等李來泰等三

十名授翰林院編修檢討並給予職銜有差

二十一年九月

廷試金德嘉等一百七十九人

賜蔡升元等進士及第出身有差

二十四年三月

廷試陸肯堂等一百六十四人

賜陸肯堂等進士及第出身有差

二十七年三月

廷試范光陽等一百四十六人

賜沈廷文等進士及第出身有差

三十年三月

廷試張瑗等一百五十七人

賜戴有祺等進士及第出身有差

三十三年三月

廷試裴之仙等一百六十八人

賜胡任輿等進士及第出身有差

三十六年七月

廷試汪士鉉等一百五十人

賜李蟠等進士及第出身有差

三十九年三月

廷試王露等三百五人

賜汪繹等進士及第出身有差

四十二年五月

廷試王式丹等一百六十六人

賜王式丹等進士及第出身有差

四十五年三月

廷試尚居易等二百九十人

賜王雲錦等進士及第出身有差

四十八年三月

廷試戴名世等二百九十二人

賜趙熊詔等進士及第出身有差

五十一年三月

廷試卜俊民等二百七十七人

賜王世琛等進士及第出身有差

五十二年

萬壽恩科十月

廷試孫見龍等一百九十六人

賜王敬銘等進士及第出身有差

五十四年三月

廷試李錦等一百九十人

賜徐陶璋等進士及第出身有差

五十七年三月

廷試楊爾德等一百六十五人

賜汪應銓等進士及第出身有差

六十年三月

廷試儲大文等一百六十三人

賜鄧鍾岳等進士及第出身有差

雍正元年

特恩開科十月

廷試楊炳等二百四十六人

賜于振等進士及第出身有差

二年十月

廷試王安國等二百九十九人

賜陳惠華等進士及第出身有差

五年四月

廷試彭啟豐等二百二十六人

金史卷之二十一
賜彭啟豐等進士及第出身有差

八年四月

廷試沈昌宇等三百九十九人

賜周壽等進士及第出身有差

十一年四月

廷試陳倓等三百二十八人

賜陳倓等進士及第出身有差

乾隆元年四月

廷試趙青藜等三百四十四人

賜金德瑛等進士及第出身有差

召試博學鴻詞一等劉綸等五名二等楊度汪等十名
授翰林院編修檢討庶吉士有差次年又補試博
學鴻詞一等萬松齡二等朱奎等三名如前例授
官有差

二年

特開恩科五月

廷試何其睿等三百二十四人

賜于敏中等進士及第出身有差

四年四月

廷試軒轅誥等三百二十八人

賜莊有恭等進士及第出身有差

七年四月

廷試金甡等三百一十三人

賜金甡等進士及第出身有差

十年五月

廷試蔣元益等三百一十三人

賜錢維城等進士及第出身有差

十三年四月

廷試鄭忼等二百六十四人

賜梁國治等進士及第出身有差

十六年五月

廷試周澧等二百四十三人

賜吳鴻等進士及第出身有差

十七年

皇太后萬壽恩科九月

廷試邵嗣宗等二百三十一人

賜秦大士等進士及第出身有差

十九年四月

廷試胡紹鼎等二百四十一人

賜莊培因等進士及第出身有差

二十二年五月

廷試蔡以臺等二百四十二人

賜蔡以臺等進士及第出身有差

二十五年五月

廷試王中孚等一百六十四人

賜畢沅等進士及第出身有差

二十六年

皇太后萬壽恩科四月

廷試陳步瀛等二百一十七人

賜王杰等進士及第出身有差

二十八年四月

廷試孫效曾等一百八十八人

賜秦大成等進士及第出身有差

三十一年四月

廷試胡珊等二百十三人

賜張書勲等進士及第出身有差

三十四年四月

廷試徐烺等一百五十一人

賜陳初哲等進士及第出身有差

三十六年

皇太后萬壽恩科四月

廷試邵晉涵等一百六十一人

賜黃軒等進士及第出身有差

三十七年四月

廷試孫辰東等一百六十二人

賜金榜等進士及第出身有差

四十年四月

廷試嚴福等一百五十八人

賜吳錫齡等進士及第出身有差

四十三年四月

廷試繆祖培等一百五十七人

賜戴衢亨等進士及第出身有差

四十五年

萬壽恩科五月

廷試汪如洋等一百五十七人

賜汪如洋等進士及第出身有差

四十六年四月

廷試錢榮等一百六十九人

賜錢榮等進士及第出身有差

四十九年四月

廷試侯健融等一百二人

賜茹荼等進士及第出身有差

皇朝文獻通考卷五十二

欽定四庫全書

皇朝文獻通考卷五十三

選舉考七

孝廉方正

臣等謹按馬端臨選舉考於舉士一門首列科目
凡明經進士諸科備焉次賢良方正則漢以後凡
天子特詔曰制舉又曰制科是也次孝廉則所稱
興廉舉孝是也西京以前賢良文學令其對策而

孝廉無策試者賢良以言揚而孝廉以行舉設科之初意有分重自不得并為一途

聖代教澤涵濡里俗龐厚加以風勵多方自雍正元年
至乾隆元年曠典以時秩舉寰宇內外蒸蒸式化
竊惟孝廉方正一科採古賢良方正之號合之孝
廉所期於應此舉者甚厚爰專錄之而以力田諸
科附焉至博學鴻詞各科係奉

特旨舉行與常行科目不同應入制科但皆屬以文藝

奉試膺選今已於舉士條依次編載不復另立專門

順治十五年吏部議覆憲臣魏裔介條奏舉用孝子授官從未有例但孝行關係風紀若有司呈報果有真正孝子許撫按具題禮部覆核勅臣部考試選授縣正佐貳等官如有冒濫捏報原舉官叅處從之

康熙六十一年

命八旗詳察孝行素著者以聞

雍正元年

詔舉孝廉方正先是康熙六十一年

詔各直省每府州縣衛各舉孝廉方正暫賜以六品頂帶
榮身以備召用至是奉

諭旨國家敦勵風俗首重賢良前所頒恩詔內有舉孝廉
方正一條距今數月未有疏聞豈通都大邑之中海澱
山陬之遠遂無潛修砥操克稱俊乂可應詔旨者與誠

恐有司急於採訪雖有端方之品無由上達殊負朕殷
殷延攬之至意著各省督撫速遵前詔確訪舉奏

二年引

見浙江直隸福建廣西孝廉方正各二員俱以知縣用五
十五歲以上者以知州用

又奉

諭旨朕惟四民以士為首農次之工商其下也漢有孝弟
力田之科而市井子孫不得仕宦重農抑末之意庶為

近古今士子讀書砥行學成世用國家榮以爵祿而農民勤勞作苦手胼足胝以供租稅養父母育妻子其敦龐淳樸之行雖寵榮非其所慕而獎賞要當有加其令州縣有司擇老農之勤勞儉樸身無過舉者歲舉一人給以八品頂帶榮身以示鼓勵

三年

諭果郡王允禮順承郡王錫保八旗漢軍內有平居孝友守分讀書之人考試既不獲中式而又不能別就者爾

二人查明分別挑選其上三旗包衣旗鼓佐領下人令
內務府總管保奏王等包衣旗鼓佐領下人令各該王
保舉

五年奉

諭旨朕即位以來加意旁求如現任官員及候補候選科
目諸人每特令薦舉遴選引見廣開錄用之途冀收羣
策之力又念各省學校原以養育人材令學臣保舉賢
能以備任使乃直省學臣所舉人數不多又或草率塞

責不能副得人之實夫十室之邑必有忠信古者取人
之法惟鄉舉里選合於三代之制今直省府州縣學貢
生員多者數百人少亦不下百餘人其中豈無行誼
醇篤好修自愛明達之士乎著州縣官會同該學教官
將貢生生員內居家孝友行止端方才可辦事而文亦
可觀者秉公確查一學各舉一人於今年冬底申報該
上司奏聞請旨朕因廣攬人材舉此曠典所以黜浮華
而資實用州縣教職為一方師長選賢薦能乃其專責

倘敢虛應故事濫舉非人照溺職例革職或徇情受賄則當重治其罪八旗之滿洲蒙古亦照此例將人品端方通曉漢文者著該佐領各舉一人庶使潛修篤行之士得以表見而國家亦收得人之效矣尋經吏部帶領各省學政薦舉生員引

見以知縣用者三員餘以國子監助教學正學錄補用
七年奉

諭旨朕廣收人材以資吏治每年保舉引見覺豫省之人

較少大約豫省士風器量謹厚有餘而才具明通不足
今欲加以策勵以備國家之用著田文鏡通行所屬選
其材猷可供任使者不拘人數資格秉公舉出該督再
加遴選奏聞送部引見又念中州之民務本力田勤於
耕作著該督於常例歲舉老農外令所屬各舉一人給
以八品頂帶以示優獎

乾隆元年吏部議准凡府州縣衛保舉孝廉方正
悉由地方紳衿耆庶隣佑里黨合詞具呈該州縣

採訪公評詳稽事實所舉或係生員會同該學教官查核造具清冊加具印甘各結申詳該督撫核實保題照

恩詔內開事例給以六品頂帶榮身如其中果有德行才識兼優堪備任用者准破格保薦倘所舉不實除本人斥革追究外其濫行出結各官照濫舉匪人例分別議處

五十年

諭福建巡撫雅德奏侯官縣職貢生許王臣自曾祖許友承至伊孫曾同居七世丁行百餘洵為盛世麻徵請旨旌表許王臣家庭順聚雍穆可風宜推旌淑之恩益廣型仁之化茲特親製詩章御書匾額以賜仍賞給緞疋建坊旌表

武舉

臣等謹按周禮賓興三曰六藝而較射之典古人尤重之容比於禮節比於樂藉以觀德後世武選

即以是起家又兼試以內場策論必習韜鈴知書
數者乃膺其選其於藝事畧備固亦舉士之一端
我

世宗憲皇帝於雍正五年

御瀛臺紫光閣閱視武舉外場復

命親軍護軍等步射時八旗人士能開數石弓以技勇稱
最者總萃林立各直省中式者見其挽強執銳驚
為神勇此皆漢六郡良家羽林期門之選及唐時

翹關負重之倫特以技勇為滿洲所素具飮聞而習見未曾設科目之名是以無從紀述我

朝舉士文武並重

命學政取士膠庠每鄉試屆期則巡撫大臣校閱外場然後扃闈試之拔其尤者分列

禁門入侍宿衛可謂榮矣大要武舉一途西北諸省擅長而東南閩廣邊地次之凡出膺節鉞任提鎮者不乏人

國家培養訓習之效亦於此徵盛云

順治元年定武舉會試於辰戌丑未年各直省武鄉試於子午卯酉年凡京衛武學官生遇子午卯酉鄉試年准一體赴試

二年准於十月舉行各直省武闈鄉試

定直省武舉名數俱照舊額

又定各直省武生鄉試例京衛武生在兵部鄉試直隸各府在保定府鄉試各省在本省布政司鄉

試大同府在大同府鄉試西延漢鳳及榆林鎮在
西安府鄉試平慶臨鞏暨兩河等處在甘肅鄉試
十六年大同府武生歸山西省合試京衛及直隸
各府奉天府武生俱歸順天府鄉試

三年定武會試事宜內三院官二員為主考官科
臣二員部臣二員為同考官御史二員為監試官
其受卷彌封謄錄對讀關防及巡視等官俱於兵
部各司官內差委初九日試騎射十二日試步射

十五日試策論是時外省以巡按為監臨官後歸
巡撫會同布按各官監射同知以下知縣以上正
途出身者四員為閤卷官康熙八年以學政為閤
卷官旋罷之仍以本省總兵官一員會同巡撫監
射

又定武進士衣頂第一甲一名武進士照題定例
賞甲冑撒袋刀弓矢韉帶等物諸武進士衣頂照
文進士一體穿帶並給折鈔銀十兩

又定武進士出身授官例一甲一名授叅將二名
授遊擊三名授都司二甲授守備三甲授署守備
著為令

八年併合畿南畿北兩武闈於真定府兵部奏言
直隸巡按既已歸併一差則畿南畿北兩武闈亦
應歸併一闈查真定府為畿南畿北適中之地且
場屋寬敞便於考試請嗣後武闈於真定舉行從
之

又歸併上下江武闈鄉試兵部奏言江南改直為省其武闈不應分上下江應照各省事例統於省城鄉試從之

十二年兵部奉

諭旨國家選舉人才共襄治理文武允宜並重今科中式武舉一百二十名應照文進士一體殿試朕親行閱視先視馬步箭後視策文永著為例屆期讀卷官用大學士學士及吏戶禮刑工五部都察院通政司大理

寺堂官各一員提調官用兵部尚書侍郎二員監
試受卷彌封掌卷巡綽寫榜各官及光祿寺備宴
俱與文同武舉人各於

天安門就試試畢以卷送

午門外東直房讀卷官公閱進

呈俟

御批一甲三名畢各赴內院公同填榜從之

又兵部奉

諭旨國家人文武並重今科武進士俱照文進士殿試大典一體舉行朕思文進士有考選庶吉士作養教習之例武進士亦應簡選教習隨侍衛學習騎射

定武進士授官品級兵部奉

諭旨今科武進士經朕親試選取于國柱等二十三名武藝可觀且係本朝初行殿試宜加優異第一名著授副將品級第二名著授叅將品級第三名著授遊擊品級第四名以至二十三名俱照例授以應得品級伊等在

京習學騎射贍養需資俱著先行照品級給俸祿頂帶
俟滿一年爾部題請選授

十五年准部議武進士

殿試讀卷傳臚俱照文場例

十六年都察院左副都御史袁懋功奏言用人之
途文武並重直隸文場合八府之士於順天府而
彙試之乃武場在內者兵部主之在外者巡撫主
之一事兩分與文場殊異請於八府武生鄉舉之

年令各道臣試其弓馬策論合式者冊送按臣按
臣彙送兵部合試於京師其試錄亦如文場進呈
御覽以重大典

上是其言下所司詳議尋議直隸八府武生與京衛武生
總屬畿輔人才允宜歸併合試其中額應酌量共
取二百名京衛一百名外州縣衛所一百名用翰
林官二員為主考小京職四員為同考官順天府
堂官為提調御史二員為監試其頭場二場監射

馬步箭考驗技勇仍照舊例臣部滿漢右侍郎考
試報可

又奉

諭旨今年文闈已再行會試至將材為詰戎飭備所需亦
宜預儲以備任使著於明年令天下武舉再行會試

十七年奉

諭旨武科取士拔其韜畧諳通弓馬嫻熟者以備將才至
於開弓舞刀掇石俱屬虛文無益以後俱不必試是年

兵部再舉會試

命內大臣及大學士監射永著為例兵部又以第二場步箭合式者不及取中之額請酌減得

旨取一百名

又兵部奉

諭旨武闈取士原以遴拔將才以資實用向來考試馬步箭沿習舊例用高大之的較射以致軟弓小箭易於倖中其用滿式弓矢者反不得合式殊非收羅材勇之意

以後鄉會考試馬箭用滿洲例射帽步箭亦照滿洲例射尋常小的爾部即通行傳諭遵行至四月

上親試會試中式武舉馬步射於

南苑

十八年兵部議准吏科給事中何澄條奏武闈考試之法請照舊例以馬步射箭數詳註卷面以便閱卷分別名次不得專憑策論得

旨武闈著先試策論後試馬步箭

又兵部奏請

殿試天下武舉得

旨武闈已考過步箭及策論又經內試選定著停止殿試
康熙三年兵部議覆禮科給事中廖丹疏言邊省
投誠官員應於各省分用其武進士候推選者甚
多請暫停武闈會試查會試大典不便停止應於
本科武進士減去一百名中額止取百名從之

又停止京衛武生武童部試歸併順天學政考試

五年舉行雲南省武鄉試照文闈額數取中二十
七名

又舉行貴州省武鄉試照文闈額數取中二十名
六年河南道御史朱裴疏言國家開科取士文武
相等查順治十五年以後歷科武舉武進士未經
選用者甚多因部科効力及提督劄委之人混淆
雜進躡等先用而科目反不得與較遲速非制科
取士之本意也請將外委効力等項與武進士武

舉等較人數多寡倣二八分缺之例使科目人員
量行先選其外委各弁雖有戰功及捕盜績不可
止憑該衙門一概咨送選補下部議行

八年六月定四川省武鄉試中額照文場例取中
四十二名

二十二年兵部遵

旨議准衛官缺出向以掌房貼案人等補授今應停止於
漢軍漢人世職並武進士內選擇輪用

二十七年定武進士挨次選補營衛守備舊例武進士推選守備分別名次在前半者候選營缺在後半者候選衛缺至是以營缺多而衛缺少嗣後不拘營缺衛缺將武進士挨次補用

二十八年兵部議准御史錢三錫請定武闡條例以馬箭中三步箭中二者為合式奉

旨馬箭弓刀等項俱已合式惟因步箭中不及兩箭不准合式似屬屈抑著再議尋議步箭雖未中式其射法精

善者亦准考取至比箭時應令內大臣都統內閣大臣與臣部公同監試庶善射者不致遺漏得

旨嗣後武鄉會考試馬箭以中四箭為合式步箭以中一箭為合式

又發各省候選武舉分屬督撫提鎮標下効用如果騎射嫻熟即以千把總題補

三十二年奉

諭旨武鄉會試舊例射的以八十步為則太遠善射者不

能多中人材或致遺棄嗣後改為五十步以中二箭為合式

又停本年粵西武鄉試以巡撫王起元奏粵西武生甚少故也

三十三年奉

諭旨朕閱今年武闈試錄江浙人中武者多山西河南兩省各中一人如此恐致遺失人材武進士之文不過熟記成語抄寫舊套而已論文取中必致不均而人材亦

多遺失必以馬步箭俱優人材出衆者為佳耳

又奉

諭旨天下武舉會試者或其人材可用騎射亦優而以不合式之故遺而不錄者有之朕意殊為憫惜令兵部宣示有願効力與再試者具呈候該部請旨再行考試遴選交火器營令其服習戎事於會試時照常考校既悉知其人亦便於拔取有超羣者即與錄用

三十六年復試下第武舉

上御瀛臺紫光閣閱武舉騎射

上發五矢皆中

諭曰今科落卷內安知無騎射俱佳而被遺者乎如其回籍則已若有留此者令兵部察明復試

四十年開粵西武科鄉試從廣西巡撫彭鵬請也
四十一年兵部議准武闈考試立空白印冊二本
第一場馬箭合式武生於面上用印時即令本生
親註姓名籍貫年貌於印冊第二場合式者亦如

之至第三場策論取中即將印冊字跡磨對以杜冒替之弊

四十八年奉

諭旨考試武舉當擴其典以備錄用即今在內部院司官筆帖式兼武職而歷陞堂官者不少在外總督總兵由行伍出身者甚多何地無才現今八旗監生為護軍驍騎者俱有入文場考試之例直隸各省綠旗營兵千把總及年滿千總不但人才壯健善馬步箭其中有通文

藝願入場就試者可分別令就武鄉會試即於其充伍
為弁之地就近鄉試不必令回原籍如此則綠旗官兵
內有才力者俱得入彀而武舉進士內亦得實有才力
之人矣尋議直隸各省綠旗營兵有通文藝願應武鄉
試者於充伍地方該營將弁申送巡撫一體鄉試
於原額內取中不中仍令歸伍又各營千把總及
年滿千總門衛所千總有願應武會試者該督撫
提鎮給咨赴部一體會試於原額取中不中仍歸

原職兵丁千把總鄉會中式後願歸職伍者聽

又奉

諭旨漢軍人等一體考試武舉武進士尋議定八旗漢軍
內務府無品筆帖式庫使由官學生補授之外郎
閑散人等有願考武生者該旗移送順天府考取
八十名鄉試時所取武生并中書及部院衙門筆
帖式廕生監生及監生之披甲護軍領催執事人
員願應武鄉試者亦移送鄉試取中四十名如不

中仍令當差會試取中八名照文場編合字號

四十九年兵部議覆陝西肅州總兵路振聲疏請
增陝西武舉額數應不准行

上諭大學士等曰陝西人材壯健者甚多又令兵丁一體
鄉試武舉額數若少則有才者不免遺漏以致壅滯著
將武舉中額照原數增二十名

又太原總兵馬見伯疏言武經七書註解互異請
選定一部頒行經部議駁

上諭大學士等曰武經七書朕俱閱過其書甚雜未必皆合於正所言火攻水戰皆是虛文若依其言之斷無勝理且有符咒占驗風雲等說適足啟小人邪心昔平三逆取臺灣定蒙古朕料理軍務甚多亦曾親身征討深知用兵之道七書之言豈可全用孟子云仁者無敵又云天時不如地利地利不如人和今日若欲另纂一書此時又非修武書之時李光地奏曰令習武者讀左傳即佳

上曰左傳浮誇昔人曾議之孟子有言可使制挺以撻秦楚之堅甲利兵矣若知此意而用兵方是總之仁者無敵此是王道與其用權謀詐偽無稽之言不若行王道則不戰而敵兵自敗矣王道二字即是極妙兵法從古窮兵黷武皆非美事善戰者皆時至事迫不得已而後用兵也昔吳三桂反時江南徽州所屬叛去一縣將軍額楚往征之有人獻策於賊云滿洲不能步戰若令人誘至稻田中即可勝之矣豈知滿洲兵強勇爭先未及

稻田已將誘者盡殺之此獻策之人亦為我兵所殺用
武經七書之人皆是此類今於武經七書內作何分別
出題及論語孟子一併出題之處著九卿定議具奏尋
議武經七書惟孫子吳子及司馬法議論近正嗣
後考試武生武童論二篇一題出論語孟子一題
出孫子吳子及司馬法舊例鄉會試論一篇策二
篇今改出論題二策題一從之

五十二年

上御暢春院內西廡開試武舉騎射技勇選宋如栢等十
五人再試以騎步射令善射侍衛等射畢

上親射二次每發皆中大學士等奉

諭旨近見直隸各省考取武進士額數或一省偏多或一
省偏少皆因不知其弓馬武藝止憑文章取中以致騎
射嫻熟諳習韜畧之人多有遺漏嗣後考取武進士不
必拘定額數俟天下會試武舉齊集京師令該部將各
省赴試到部武舉照例考試弓馬將合式武舉等實數

查明預行奏聞朕計省之大小人之多寡照考取文進士例按省酌定取中額數則學習武藝弓馬優長者不致遺漏矣

五十六年定武鄉試日期自十月初九日至十三日試騎射技勇十四日入闈從府尹俞化鵬請也五十九年兵部奏定將在部効力之武生及官員子弟停其取用專取武舉其武進士內有情願効力者亦准收錄宗人府鑾儀衛兵科俱照兵部一

體取用効力三年後考試武進士一等者以營守
備推用二等者以衛守備推用武舉一等者亦以
營守備推用二等者以守禦所千總推用

雍正元年定滿洲武鄉會試中額八旗滿洲等照
漢軍例考取武舉二十名武進士四名編滿字號
至十二年停止

又

命賞會試中式武舉銀兩為整理衣服賃取馬匹之用

又兵部奉

上諭今科中式武進士係元年所取狀元授為一等侍衛
榜眼探花授為二等侍衛二甲十三名授為三等侍衛
令戴孔雀翎三甲記名三十六人俱授藍翎餘照例揀
選補用

二年奉

諭旨陝西地屬雍涼人材壯健強勇者多騎射嫻熟勝於
他省每科鄉試取中不過三十名而入學額數亦與他

省不相上下額少人多不無屈抑自雍正四年鄉試為始西安甘肅武舉各加中十名其武童入學額數若通省俱加恐有冒濫照文童改學例令督撫會同學臣查明技勇最優之州縣酌量奏請加額

又立武闈好字號取中外場兵部議覆吏部侍郎史貽直條奏武闈直省鄉試請照會試例擇其弓馬嫻熟技勇出羣者另立好字號以便取拔應如所請得

旨考試武舉議定編好字號在京武鄉試朕派信用大臣
考試嗣後各省武鄉試或以好字號取中或以文章好
取中之處著於解部武鄉試錄內註明以便會試時查
對至雍正四年定鄉會試外場弓馬技勇好者另編好
字且分別雙單好字移送內簾先於好字號卷內
選取如不足數乃選取餘卷

又兵部遵

旨議准每科武進士前半以營守備用後半以衛守備用

今衛守備之缺既經裁減嗣後將衛守備用之武進士內再分十五名以營守備用於雙月營守備各班之末另立一班推補守禦所千總裁減之外存缺無幾舊例糧船回空隨幫千總以衛千總推用此等人員總漕稱為明季世職子孫今既非世職應停其頂補將揀選之武舉候推守禦所千總人員內頂補推用

又定補授管門千總人員京師外城七門內九門

每門額設千總二員嗣後千總缺出停止補授漢人將滿洲漢軍武舉並漢軍捐千總者補授

又

賞給會試下第武舉回籍路費如文會試例

五年定武進士授官例一甲進士照元年例補授侍衛二甲挑選十名授三等侍衛三甲挑選十名授藍翎侍衛俱俟補授營缺時照侍衛品級兼銜其三甲武進士候選守備者兵部奏請

欽點大臣會同兵部揀選一等二者以營守備註冊三等者以衛守備註冊得缺之日俱兼以署守備管事如有弓馬生疎者令其回籍學習俟騎射可觀再行赴部考驗

又

勅浙江武舉照舊會試時停止浙江文會試兵部奏浙江武舉會試應一併停止得

旨士習澆漓不干武途况浙省文有餘而武不足武科著

照舊會試

又八旗都統奉

諭旨歷來滿洲技勇罕與比倫前令八旗查得親軍護軍
內能開硬弓者現有一萬八千餘人昨在瀛臺令八旗
人等校射衆武舉等咸驚異以為從來罕覩朕心深為
喜悅著分別賞給銀兩伊等藝勇超羣是其盡心學習
所致嗣後務更加勉勵不可以弓力相爭尚將此通諭
八旗知之

又兵部奉

諭旨前科武進士大半皆授為侍衛餘亦依次俱得選用
今科進士朕恐其多選侍衛反不能盡心學習所以揀
選侍衛者甚少但伊等未得一時錄用置之閑散殊為
可惜今特廣為加恩將未選侍衛之滿洲蒙古進士授
為藍翎交與領侍衛內大臣効力行走漢軍進士交與
該旗以驍騎校補用其餘漢進士有人材可用者分發
各省賞食千總俸令督撫提鎮試看如果材力壯勇効

力勤謹者以守備題補

七年奉

諭旨向例武舉在本省學習之後遇有千把總缺出未免
鑽營倖進且該管官之秉公拔補與否亦無從考驗嗣
後將隨標差操學習之武舉等令該撫等看其材技優
嫻曉習營伍者照年滿千總例送部考驗分發別省遇
有千把缺出即行補授則人材既可造就而拔補亦得
公平將此永著為例

又兵部遵

旨議定滿洲武舉補授內九門千總者遇會試之年仍准
入場考試平時令步軍統領考驗限以三年材技
優長者補授巡捕營守備中平者補授本佐領下
護軍校并本旗驍騎校等缺平常者留門當差學
習有成再行保送至滿洲武進士除選授侍衛外
其餘仍以京營守備與驍騎校護軍校等缺補授
又兵部奉

諭旨各省每科武鄉試例用巡撫為主考官朕思各省巡撫多有未曾習學騎射技勇者何以定優劣從今科為始各省著就近省城之提督總兵一員同考外場秉公拔取若駐劄路遠或因公他出則令派委副將一員代之

九年大學士等奉

諭旨各省督撫著於所屬地方召募揀選人材壯健技勇可觀者百餘人咨送兵部奏聞候朕揀派官員訓練教

習以備軍旅之用武生童生及鄉勇民壯等俱可入選
每人本籍額外給與守糧一分以養贍其家口本人進
京之時著督撫動支公用銀兩賞給路費

十年奉

諭旨向因落第武舉其中不無才力可用之人是以令本
省督撫提鎮秉公考驗將年力精壯弓馬可觀者留營
給與額外馬糧一分令其差操學習俾得熟練營伍以
備將來將弁之用原令該管大臣慎重遴選使人材有

所造就也今聞外省庸劣無能之人頗有濫充者著該部通行各省將技勇可用之武舉令其充補經制馬糧其不願留營及騎射生疎材力不及者令其回籍自行學習不得留營虛佔額糧之數

又奉

諭旨凡分發各省試用之武進士原令其學習營務必須弓馬優嫻熟諳營伍方可題補近見爾部於武進士題補守備時不計科分之淺深弓馬之優劣概以為合例

以致督撫提鎮因一時營員內不得合例之人遽將科分尚淺營伍未諳之武進士題補轉不如用久歷行伍之人於營務有裨益也嗣後武進士題補守備若科分不及應選之期即屬不合例可傳諭各省知之

又兵部奉

諭旨朕看滿洲武舉等於綠旗營不甚相宜嗣後將如何補用及如何陞轉之處詳議具奏尋議八旗武舉有人材出衆者除

特恩選用外其餘俱請交各該處以應得之缺補用但伊等品級不同則陞用亦宜分別嗣後應照漢人例請派大臣驗看分別等次交與該旗於護軍驍騎等缺挨次委署試用入於應陞人員內帶領引

見補授平常者駁回學習以圖上進內有願在旗當護軍前鋒効力之人亦著挑取令其當差行走挨次補用行走三年諳練稱職者入於應陞人員內帶領引

見再此等人員係實授者自有應得之俸其委署給與錢糧米石所服頂帶悉照委署之例現任內九門滿千總應請改補以昭畫一嗣後內九門千總缺出請照外七門千總例將漢軍武舉及捐納人員補用從之

十一年奉

諭旨武場鄉會兩試原期選俊儲材所以人材壯健技勇兼優者外場考試另編好字號並分別雙單令入內場

再考試文藝比較取中以杜冒濫倖進諸弊本年武會
試有頂替進場作弊者當經查出交部治罪又有人材
技勇皆屬平常而考試大臣濫列好字號入場取中者
現在查叅黜革議處俾各知儆戒至於各省學臣考試
聞有弓馬平庸文理粗通之人混入內場越號換卷傳
遞代筆賄囑倩代揆厥所由總由府州縣考試時每以
廣收博取市寬大之名無論騎射優劣悉行錄送遂令
技藝不堪漢仗猥瑣之輩混入內場種種作弊嗣後府

州縣官考試武童倘不悉心校閱濫行錄送者著該學政題叅議處其學政校閱外場尤當加意選擇若將平常懦弱之人濫列好字號入場取中亦著督撫查叅

乾隆元年奉

諭旨今科武舉殿試照該部所擬日期舉行朕在三年服制之內其考試弓馬等項著派王大臣在紫光閣閱看將擬在前列者帶至養心殿候朕親定揭曉之日照今年文殿試之例傳臚朕不陞殿

五年准武進士隨營差操各省兵丁應鄉試者於
中式武舉之後仍准食本身馬糧隨營差操若中
式武進士除選取侍衛外餘皆離營候選開除名
糧奉

諭旨伊等開糧之後衣食匱乏未免拮据且恐離營日
久漸疎技藝應酌量變通辦理嗣後兵丁中式武進
士之後有情願回營効力者准仍留本身馬糧隨營
差操遇有署事之處准一體酌量委署學習

八年疏通武舉隨幫効力人員定例漢軍漢人武舉及各省世職隨幫於會試之年赴部報名足有百人之數兵部奏請恭候

欽點大臣會同兵部堂官考試馬步箭分別等第其馬步箭俱優者列為一等馬箭尚優步箭平常步箭尚優馬箭平常者列為二等馬步箭俱平常者列為三等均註冊歸入各班內選用衛千總如弓馬生疎者列為四等令其回籍學習下次再行揀選

其弓馬甚劣人衰老不堪者列為五等黜退至是奉

諭旨武舉內隨幫効力年滿人員應以衛千總用者其選用之法按其從前揀選等第分班銓選一等人數無多選期尚速其二等者有數十人三等者多至二百餘人每年選用不過三四人甚為壅滯朕思衛千總與營千總雖屬有間但武職人員俱尚技勇亦當及其強壯而用之且此項武舉既係隨幫年滿非開

散武舉可比若遲至二三十年之久方得錄用未免
精力就衰難為國家宣力所當酌量疏通下部議行
二十一年安徽巡撫高晉奏武闈鄉試頭二兩場
合式舉子例於左右兩頰用以印記以杜頂替代
倩之弊法誠善也第首场印面之後計至三場點
名之時將及經旬之久始則一面有印繼則兩頰
皆然日則不能盥洗夜則難以就枕旬日之內必
致模糊臣愚以為與其印面不若即以印面之印

印記於各舉子左右小臂面臂雖更例實相符從之

二十四年御史戈濤奏武闈應試之人必弓刀石
三項技勇有一項在頭號二號者方准合式令入
內場列於甬道西號房其雙單好字號者列於甬
道東號房以絕代倩之弊再武場以武經為重應
裁汰四書論題止存武經論及策問題一道下部
議行

二十五年更定外場事宜外場向例馬箭連射三
回共九箭中四者為合式試技勇合式後復射地
毬一回又例載遠把以五十步為程高七尺寬五
尺每人各射九箭中二者為合式試技勇後復射
近把又應試弓力硬軟向聽自便至是江蘇巡撫
陳宏謀奏請馬箭止射二回共六箭再射地毬一
回三回共中三箭者為合式其試技勇後再試地
毬之例應行停止又遠把酌改三十步每人各射

六箭以中二者為合式射把不得隨意損益其試技勇後再試近把之例應併停止至馬弓以三力為率步弓以五力為率其不及者不准合式有能加重者聽下部議行

二十七年兵部議覆侍郎王際華奏武科取中原以弓馬技勇為主至內場文藝祇以叅核去取並非專重是以考試外場定有雙單好及合式字號密印於監箭冊籍之上內場閱文先就雙好中儘

數取擇始及單好如中額不敷方及合式字號其實雙單好字號中挑選之數視中額原自有餘其文理平順之卷儘數中式以致合式字號幾成虛設就中文理稍優之人為他人代倩罔利弊竇叢生應如所請竟行裁去合式字號庶可以慎考核而肅場規從之

三十三年改定江南武鄉試令總督主考例從兩江總督高晉請也

設立武鄉會試內場監試兵部議覆江南道御史
覺羅敦岱疏稱武鄉會試內場應設立監試專司
其事嗣後鄉會試臣部咨取滿漢御史職名開列
具題恭候

欽點滿漢各一員令其入場監試其場外牆垣俱照文
場之例派弁兵員役晝夜巡查以昭嚴密從之
三十六年停現任官員子弟入伍食糧應試兵部
議覆兩江總督高晉疏言現任官員子弟既准其

入伍食糧復准其入場應試有佔武舉名額嗣後籍隸他省官員隨任子弟概不准其就現任本省應試併不准其入伍食糧有佔該省兵額至籍隸本省員弁子弟俱令各歸本縣不准於現在任所地方入伍應試從之

又兵部議覆署雲南巡撫諾穆親條奏武闈內場主考等官改用筆色請嗣後武闈鄉會試內場閱卷房考官定以紫筆主考官定以赭黃其印卷戳

記及一切應用藍色之處俱照文闡之例改用紫色以歸畫一從之

又兵部議工部尚書兼步軍統領忠勇公福隆安奏巡捕營馬步兵丁由大宛兩縣之人挑補後情願考試者令其與武童一體應試果能取中再准鄉試其馬兵准鄉試之例永行停止至營員子弟拔補弁兵令改調營汛不屬父兄考核管轄均應如所請從之

又順天府尹裘曰修等奏武闈鄉試嚴飭各州縣將應解鄉厨鄉皂雜夫等役造具年貌清冊面用印記填給腰牌再查外場監試御史向例十月十一日外場事竣十三日始行入闈應請嗣後令該御史等於外場完竣後即日先入內闈將應進各項夫役由該御史驗明腰牌印記搜檢放入其中倘有印記模糊及並無印記者立時查究至會試事同一例所有厨皂等役應請照鄉試畫一辦理

從之

三十八年

諭馬步兵均屬行伍馬兵考取武生既准其仍留原糧
則步守兵丁原可毋庸歧視至向例武生不准入伍
食糧必須註銷武生方准充補不過以武生名列膠
庠稍存優異甚屬無謂況武生鄉會試中式後其所
得官職亦不過綠營弁員則以武生在營學習當差
尤屬有益嗣後如武生有情願入伍食糧者准其呈

報學政即令兼充毋庸將武生註銷著為令

四十年兵部議覆鴻臚寺卿江蘭奏請會試武舉
於試期前一日酌量各省人數多寡分為四冊繕
籤封固於宣

旨後分圍考試再於考試之後將六部滿漢堂官開列
奏請

欽點二三員傳集中式武舉按照會試原冊弓刀石勛
重號數令其逐一演試如有前後參差者即行參

奏將該武舉照文會試磨勘之例罰停

殿試仍將原挑之監射大臣交部議處從之

又兵部議覆江南道御史李廷欽條奏監射大臣
各圍箭冊俱係自行登記毋庸假手官員應請概
不准隨帶至隨帶跟役概不得過四名之外其監
射大臣及兵部堂官宣

旨後即不准歸私宅亦不准在外圍附近武舉之處居
住武闈鄉試亦照此辦理從之

又尚書公福隆安奏嗣後每遇武會試時監射大臣較准弓力即親畫押外場事畢將原弓存貯兵部俟

殿試後再交本處領回如此似覺更為詳慎從之

四十五年

諭向來武鄉會試考試技勇內硬弓一項原以十二力為頭號如果從容滿引可以中式即力量較優亦不過多加二三力足以見長近來士子每多熟中競勝

且得失之念太重輒填註十七八力及至較試時類皆勉強從事并竟有不能者殊屬無謂嗣後考試武場硬弓務以滿足入彀為度其註考冊內有能過頭號弓十二力以上者亦不得出十五力著為令

四十七年兵部議覆山東道御史楊九思奏武鄉會試內場出題之日令監試御史偕同提調等官親入號舍照例挨查倘有坐號不對立即究治至水火夫役於白晝差使完畢即扃閑空房外加封

鎖不許擅行出入其圍牆以外嚴飭巡緝員弁多
派兵丁晝夜巡邏以肅場規從之

臣等謹按中樞政考直省武鄉試中額順天一百
五十一名內漢軍四十名奉天三名江南六十三
名浙江五十名江西四十四名湖北二十五名湖
南二十四名福建五十名山東四十六名山西四
十名西安五十名甘肅五十名四川四十名廣東
四十名河南四十七名雲南四十二名貴州二十

三名廣西三十名



皇朝文獻通考卷五十三